
ЁЗЁВОНДА ТУМАНЛАРАРО ҚЎШМА ШИКАСТЛАНИШЛАР ВА ЎТКИР ҚОН-ТОМИР КАСАЛЛИКЛАРИ МАРКАЗИ ИШ БОШЛАДИ

Ёзёвонда туман тиббиёт бирлашмаси таркибида ташкил этилган туманлараро қўшма шикастланишлар ва ўткир қон-томир касалликлари маркази тантанали тадбир билан фойдаланишга топширилди. Тадбирда вилоят ҳокими Хайрулло Бозоров иштирок этди.

Президентимизнинг 2021 йил 26 июлдаги “Аҳолига кўрсатилаётган тиббий ёрдам сифатини янада яхшилаш чора-тадбирлари тўғрисида”ги қарори билан 2021-2022 йиллар давомида Республика бўйича жами 35 та туманлараро қўшма шикастланишлар ва ўткир қон-томир касалликлари марказлари ташкил этилиши белгиланган. Шундай марказлардан вилоятимизда иккинчиси Қўқон шаҳридан сўнг Ёзёвонда иш бошлади. Қарорга асосан Бағдод тумани тиббиёт бирлашмаси таркибида ҳам туманлараро қўшма шикастланишлар ва ўткир қон-томир касалликлари ташкил этилади.

8 ой давомида қуриб битказилган марказнинг қурилиш ишлари учун 7,5 миллиард сўм маблағ сарфланди. Марказни жиҳозлаш учун эса 1,8 миллион доллар миқдорида маблағ йўналтирилиб, 27 турдаги тиббий жиҳозлар, шу жумладан қиймати 2,5 миллиард сўм бўлган Мультисперал компьютер томографияси (МСКТ) аппарати, 2,2 миллиард сўм қийматидаги Рентген-диагностика аппарати, 2 миллиард сўмлик гемодиализ аппарати келтирилиб, ўрнатилди.

Ёзёвон туманлараро қўшма шикастланишлар ва ўткир қон-томир касалликлари маркази 50 ўринга мўлжалланган бўлиб, марказда олий тоифага эга 32 нафар шифокор, 210 нафар ўрта тиббиёт ходимлари, 96 нафар кичик тиббиёт ходимлари фаолият кўрсатиши белгиланган.

Марказга келтирилган беморларга замонавий тиббий аппаратуралардан фойдаланган ҳолда юқори технологик операциялар, шу жумладан, юрак-қон томирларига стент қўйиш амалиёти йўлга қўйилади. Компьютерли томограф ва замонавий рентген аппарати ёрдамида беморларга шошилиш равишда ташхис қўйиш, ўз вақтида юқори малакали шошилиш тиббий ёрдам кўрсатиш имконияти мавжуд.

Ёзёвон туманлараро қўшма шикастланишлар ва ўткир қон-томир касалликлари маркази ёзёвонликлар билан бирга ҳудуддаги Қува, Тошлоқ ва Қўштепа туманлари аҳолисига ҳам шошилиш тиббий ёрдам кўрсатади.

[Бизни ижтимоий тармоқларда кузатинг Facebook, Telegram, Facebook, YouTube, Instagram](#)

2022-06-07 12:44:25